

方山薛先生全集

方山先生全集卷之五十一

公移五

南吏部
北禮部

行五城兵馬司牌

照得考察之典所當致慎謗毀之禁不可不嚴往年一遇考察之期當該辦事員役及隸卒人等假以訪察爲由通同各衙門人役或陰行誑騙或恣意報復苟快已私無所不至卽今考察在邇本司深懲此弊務核實行罔事風聞且人才可惜决不吹毛求疵而采訪有年並不臨時輕信一切遠方之事中篝之言原無可證悉置不理其衆口鑠金積毀銷骨自古難

免今在所原天日照臨矢心從事但恐前項匪人仍
踵舊弊生事造言訛傳惑聽理合禁革除稟堂外爲
此牌仰五城兵馬司各撥弓兵二十名常川於各地
方晝夜巡邏凡遇有毀謗書帖登時燒毀其有獲住
投書粘帖之人卽拿送該司監候事畢之日叅送法
司照例重處仍大書備云出給告示於人煙輳集去
處張掛曉諭施行

咨吏部案呈

照得北告南吏楊方等七名俱係奸徒止因販賣金
華酒入京賄通該部驗封司都吏常文祥假充辦滿

吏告送南部聽撥到司投遞門供中間叅充年月前
後大小石數欠明被本司察出稟堂叅究取供送刑
部覆審詐偽情由的確已將前項人犯各照例問發
抄招到司除稟堂附卷外其合問都吏常文祥係北
部當該人役理合具由呈堂咨行該部施行仍乞嚴
禁詐冒今後該部凡遇辦滿告南當該吏典仍照吏
典給由事例發該部考功司嚴查吏冊在外兩考叅
充衙門并先後年月一應緣事丁憂歇役等項務要
分明取具該司印信手本同咨文賚送南部仍赴南
考功司覆查明白方送驗封司聽撥當該庶杜前項

詐偽之弊爲此具呈

行四川湖廣廣東廣西江西福建各巡按衙門

手本

照得舊例各省大小衙門吏典應役之初卽將年甲籍貫叅充年月衙門行頭上下手姓名及丁憂事故等項備細造冊預先送部至該吏役滿給由到部取出查對相同然後收役所以慎防其詐偽也但司府州縣有司衙門一應吏冊聽憑吏書攢造弊孔旋生吏部先年咨行都察院行各該巡按監察御史今後凡布政司解部吏冊必先送巡按衙門查勘無弊用

印鈐蓋然後送部其給由吏所給咨批亦必經由巡按衙門驗實掛號方給與執照赴部此其關防誠爲嚴密柰何行之既久此法漸弛近來各省解到吏冊多無巡按鈐印其所給咨批多係巡按出巡在外布政司因恐往復不便遂將花攔咨批呈送巡按衙門用印類發臨時填給以致近來吏典不無頂替詐僞之弊及至行查動逾年月官更吏改支吾開銷弊端日起爲此除稟堂外合用手本前去各該巡按衙門查照施行

示諭給由吏

凡給由吏到部查得兩考冊同別無事故者即與收撥其或冊有前考而無後考或有後考而無前考或上下手接役不明或役內錢糧不明或滿後歇役二年或緣事無抄招亦與暫撥或咨批無巡按號印或滿後歇役在二年十個月之外必聽查回銷至日方與撥辦其或前考滿後歇役三年應該重歷或後考滿後歇役三年應該查革者自有條例職掌決難容徇無得多方夤緣自取罪悔其查冊之時許本吏自赴冊房眼同查冊吏取出該省吏冊自行揭查比對若或有隱匿抽換以圖索詐者隨即面稟以憑究

諭革退厨役夫告示

以下北禮部行

照得光祿太常厨役夫之設原有定數後來各項京游希圖月支米一石實緣冒充因循年久遂致額外增添三千餘名計一年之間冒充月支月糧三萬餘石冗食費財亦非細事近禮科建議本部題奉欽依已行盡數查革柰有等狐鼠之徒稍因憑藉仍牽摻名缺冒告通狀到司多方纏繞深爲可惡除立案不行外如再仍前投託勢要結黨喧讓者定行指名奏治不恕

諭投文領文各項人員告示

本司投文領文俱有限期並不稽遲近聞各該房科故意耽延需索以致守候人難深爲未便今後凡領勘合各司付到隨即發行其解納錢糧係本部者即與收貯係太常光祿者即發手本前去上納凡一應文移如有仍前耽延需索者許各該解事領文人役或赴司或在馬前不時面稟以憑查究施行

諭 皇城等門官軍告示

卽今虜寇深入乏人委用本職蒙本部劄付欽奉

聖諭着令直 皇城等門整點官軍晝夜防護本職卽由 長安左右門至 承天 端門 左右掖等

門逐一整點官軍各衛官俱不賚花名手本難以稽
查照得本職雖係禮官既奉有 欽依劄付卽與汝
等相關 天顏只尺寇在門庭正臣子鞠躬盡瘁之
日也各衛官軍豈得安常襲故不加警惕乎除以往
不究外特茲曉諭各宿衛官軍如有別項差用者刻
期喚回齊集整搦盔甲器械晝夜巡邏仍各備花名
手本以憑不時點閱如違定行 奏聞處治

行光祿寺手本

照得夷情叵測固當周密其防而久客思歸亦當俯
順其欲彘顏三衛進貢夷人已經本部具題筵宴隨

因各官商議恐虜人未退致生他變擬將另題改期
卽令三衛通事赴司告稱進貢日久天氣漸寒若再
延緩情苦難當本司稟堂仍依原定日期進宴就設
於烏蠻驛了事以慰其情免伊出街行走庶爲兩便
合用手本前去光祿寺查照施行

行太醫院手本

照得該院收納藥材必由本部官監收者非但以錢
糧干係亦欲藥物之精也近來該院將各處解送藥
材其折色先已稱收似亦無害但本色亦多非道地
所產大率由該院吏書供應人役將舊所積剩藥材

作爲鮮來之物當官虛應故事恐日復一日將來
內府何以取用自今以後合戒飭吏書供應人役必
須預先慎擇庶可臨時應用除稟堂外合用手本前
去太醫院查照施行

方山先生全集卷五十一

方山先生全集卷之五十二

公移六 慈谿縣行

申寢無故更作

照得本職自嘉靖十四年十二月二十八日到任據
本縣儒學生員翁紀及槩縣里老耆民人等各連名
呈稱本縣布按二分司原建慈湖之北環山面水風
氣攸鍾唐宋歷今世宜風憲其陰陽醫學射圃舊設
本縣西南城隍廟下今本府推官馬署印驀欲折毀
二司移建陰陽醫學射圃基內又折醫學射圃移置
他所兩番變易費計百千怨聲滿塗聞者褫冕事體

匪輕關係誠重等情到縣及本職出行老幼恟惶群
避道訴咸稱不便職雖初任觸目激中亦當申處據
呈吊查該卷一宗爲風雨損壞公廨乞爲修理事嘉
靖十四年十一月二十九日該掌縣事推官馬中驥
要將前項各司改移城隍廟側陰陽醫學射圃基內
重建關縣備申本院蒙批如擬仰馬推官措處脩蓋
嘉靖十五年正月十五日隨蒙本官臨縣公同本職
及槩縣生員糧里老者民人等前去拆毀間看得各
司廳堂俱係堅固雖被風雨吹損不過量添椽瓦修
蓋可以支持數年設若改移未免原物傷損縱使措

處出於罪犯緣邑僻在海隅小民無知一時犯法中
間有力者少無力者多終難補足及合用扛擡等項
人夫亦須民力職雖迂腐未達時宜然孰觀人情事
勢則前項工役誠不必興思昔召公賦政南國舍止
甘棠當時懷保咸和物力豐盛恩澤下究庶民子來
豈不能致美輪奐崇飾觀瞻原召公之意則以爲苟
安黎庶遑恤吾身故詩人爲之賦甘棠而千萬世之
下頌召公之德不衰况新作南門春秋致譏而韓昭
侯作高門屈宜曰有時屈舉羸之諫無非見勞民爲
重事也今日慈谿十室九空流離載道若興此役縱

委官得人而胥吏爲姦多科冒破斷亦不免宜從衆
照舊脩蓋爲此關縣轉達施行

申革縣官入山做茶

檢得本縣誌稱縣後諸山產茶今無一種其本縣茶
之入貢實由宋寶佑間丞相史嵩之在於縣西南六
十里岡山相治墓地隨建功德院請額名開壽普光
禪寺其山舊頗產茶同朝殿帥范文虎因置茶局進
貢推原其意不過欲開公家貢獻之途使私壟永無
荒蕪之患元及國初皆仍其舊至永樂間知縣余
館建局在山之西南每年在清明前一日掌印官入

山監管做茶至穀雨日方回著令里甲每里出米壹
斗煮貳觔又各納稻穀一十斤煮米爲焙手飯食穀
給童子揀茶及有士民乘時饋送禮物名爲探訪實
則假此以通私賄費固不貲弊亦日積墮奸雄既死
之遺謀爲今日無窮之患害前人因襲遂爲故事本
縣訪得紹興府會稽縣亦係有茶縣分隨差吏前往
查得該縣額辦茶牙二十斤著令會稽縣二十七二
十八等都里採辦送赴該縣監督揀選其路費於會
議冊內催取工房買辦科丁田內支銀一十兩給發
解茶吏收領解府起本給批於穀雨內就差本吏徑

自奏聞赴禮部轉送光祿寺交納今據前因深爲便益及思本職原係直隸常州府武進縣人實與宜興縣陽羨茶山隣界其所貢茶額斤數倍於本縣止是清明日掌印官至茶所一祭即回亦未嘗在山監管合令本縣照依會稽等縣事例著令該都里分採辦茶芽送赴本縣監督揀選所用除黃絹竹篾茶山祭品等項舊議處冊內原用銀二十二兩今減去十二兩止湏用銀十兩及焙手供給止湏用米六石就於銀拾兩內取用其舊用煮穀等項與一切浮費盡行裁革但本縣每年所用茶芽額辦二百六十斤比

之會稽不啻十倍其所差貢茶該吏路費仍照會議冊內支給銀二十八兩恐亦過多合乞再行量省八兩其有官吏仍前受饋送土宜禮物及棍徒指此科擾小民者悉問擬如律則本縣幾百年之宿弊一旦釐革而上嚴貢獻之禮下立官吏之防士風不偷民財日省矣

（申查預備際畱等倉糧以清宿弊

照得本縣久缺正官叢奸積弊玩法欺公凡百隱漏不可枚舉本職自嘉靖十四年十二月二十八日到任止憑主簿皮章將印交管外至次年正月十二日

蒙先曾署掌本縣印信本府推官馬中驥臨縣止將
耳房庫銀兩數目交盤各立文簿合同執照將銀著
令庫子孫濂看管外其預備際畱等倉俱未蒙交盤
過割至二月十七日查盤前倉並無厥經文簿止據
糧房吏翁眷等預備倉斗級等開稱在倉稻穀壹拾
貳石柒斗八升肆合公同查盤明白新置厥經一扇
照數登記着令接役斗級收執看管外其際畱倉金
無顆粒糧米在倉合闈本縣煩爲追出厥經卷冊逐
一查算庶免侵欺等因到縣隨據糧房吏及舊斗級
等執稱原無厥經文簿揆之於法實難准信連月追

併止取出預備倉嘉靖八九等年朽舊文簿內收放
數目俱無查考其十三四等年分敷經正係交代接
管該應清查任從嚴追不行取出即欲問擬侵欺緣
無數目可証若不預行申明又恐倉糧事體重大日
久貽累呈稟無及竊思得本縣衙門吏書庫役人等
俱婁頭奸猾無藉光棍盤據糾結彼出此入百方推
調動制縣官數十年以來號稱難治前任知縣何世
祺鄧熺等俱彼平空挾制告訐何世祺改官去後仍
行提來事雖得白貽累萬千鄧熺誣罔雖亦得白願
受治民毆辱鬱氣成疾以致殞命爲禍尤慘中外皆

知士人共憤似此奸頑得志愈無忌憚前項厥經若不乘時追出算明將來不知何意擬合申乞或另委官嚴查或委原署印官追究則不惟錢糧得清而本縣官司亦免貽累矣

申改浮圖以崇正學

照得本縣有宋儒楊文元公學宗古聖道妙傳心著書立言發微闡奧誠一代之名儒振古之豪傑也舊有書院一所設公貌像後學瞻齊民景仰久爲嗣孫居住族屬漸煩人品不一以致傾圮屢經有司修葺多爲私家領價唯是費用雖殷傾圮如故近蒙巡

按御史張按臨本縣親詣公祠面委知縣薛動支本院贓罰修理重道崇儒勵世範俗此固觀風之盛事亦有司之首務也隨卷查嘉靖十二年九月內蒙分巡道僉事王紙牌爲葺頽廢以崇先哲事仰本縣官吏差委人員前去慈湖書院估計添修工料數目等因到縣比時本縣遵依行委典史蔣全帶同匠作人等估計工料銀二十二兩七錢三分於十三年八月扣存孤老柴布銀一十三兩七錢伍分發委義民周瑛買辦木植修理交與本院子孫楊濟等收訖十四年七月楊濟又當本縣領銀伍兩七錢三分取領狀

附卷先後共領銀一十九兩四錢八分若用以修葺書院則一年之間安得遽致傾圮柰爲之子孫者不思先世之德冒破公家之費而文元公之靈亦必有所不安矣况今書院已爲楊氏子婦雜居止可作爲家廟其門人高第必不妥靈而有司曾爲修葺者俱列牌位尤其無謂原楊氏子孫之意不過歆動將來有司之修理而上瞻乃祖之神亦何顏何心也但春秋之法爲賢者諱雖在子孫猶當十世宥之前項工料價銀伏乞免賜追究但本縣依奉鈞語合當從長區處境內儒者文元爲最復查得楊公安道明經講

學崇正黜邪大爲范文正公所敬杜公醇經明行修
師世範俗大爲王文公所服黃公東發淹貫經子著
有日抄而尤崇尚朱子之學皆宋代之名儒與文元
相後先者也他如建昌之傅正夫嚴陵之錢時雖非
生於斯土而實文元公之高弟與夫永樂間之陳光
世力學不懈師道自尊雖生不同時而亦有得於理
學者也仰思前修咸可誦法本縣照得普濟寺見有
宮室已無僧人坐落慈湖東北負山面水且與公館
分司相近莫若毀去佛像中列二揚杜黃四公旁列
文元公之門人如傅錢二子以下咸以次附之而陳

方山全集卷之三十一
七
光世亦與焉皆設爲木主有司春秋量釜癘藻而儒
生學子聽其講習於中况慈湖書院近年設有門子
就着令看守禮以義起道待人行不惟示一方之觀
法而實舉百年之曠典也况本縣人民迷惑佛教而
白蓮社會屢禁不悛轉移之間庶知趨舍其楊氏舊
有書院則子孫世守家廟理宜自行修理不當煩有
司公帑但當量免雜差以示褒崇庶息其妄念養其
良心而於文元公之後亦不爲小補矣

申革冗費

竊惟王道在於足民禮節生於衣食稽諸往籍所載

舉皆着實可行今浙江爲東南大省而民風土俗漸不如舊揆厥所原皆由賦繁役重財盡民窮饑寒切身不顧廉耻近考改議賦役文冊皆一時藩省名臣經畫卑官末學淺識小才固不敢出位妄議但自慈谿一縣觀之上供歲額似不可少而邑里浮費則有可省况本縣誌稱畏刑易治而近多囂訟玩法一錢尺帛致傷同氣積逋累欠其犯嚴刑比之他邑尤爲頽敗本職叨任縣官實切惶懼若不稍爲區處將來益不可爲謹具可以減省者數條開後關煩轉達施行准此照得本縣負山濱海田地寡薄賦役繁難兼

之入缺正官公私未免妄費小民愈覺貧窮輕蹈刑
憲罔知禮節多由於此昔司馬公謂天地所生財貨
止有此數不在官則在民今雖所省不多而一簣爲
山細流成海積之數年民力亦可以少寬矣擬合申
請憲斷永遵守施行

一冊設支應銀貳伯兩近查得支應止該奉有真正
關文上司衙門牌面者方許准作支銷其餘府官臨
縣供給及一應士夫交際瑣享往來雖情不可無而
法不可有者並不得於內支取本縣不係四方通衢
關文牌面亦不見十分往來量留七十二兩大約一

日該銀二錢亦穀應用况此銀徵收在官年常被掌管人役侵尅致累查盤伏乞減去銀一百二十八兩一冊設和顧船二十隻每隻該與價銀七兩二錢共銀一百四十四兩本縣差使頗少而一年上司往來多亦不過三四次雖或有差約船一隻一年不過用伊二十餘次暇日伊自別顧與人得利每船給與銀三兩六錢已穀工食近訪得前項船戶况又多是互相影射伏乞減去銀七十二兩

一冊設進茶黃絹袋袂旗號篋扛弁祭禮路費銀五十兩內黃絹竹篋祭品等物舊筭該銀二十二兩進

茶吏路費二十八兩本年路費雖已減去銀六兩近蒙本院將茶編入丁田內出辦尤爲節省自今以後其黃絹竹篾祭品等物止用銀十兩已穀買辦進茶路費給與二十兩亦穀使用伏乞減去銀二十兩

一冊設存恤孤老每名冬夏布花木柴銀六兩本縣共設銀六十兩近查得本縣孤老多係傍縣得過人戶謀求里書妄報冒濫已行革去止留男女一十九名口由蒙本院依擬後雖有續報收養大約留銀二十兩已穀給散伏乞減去銀四十兩

一鄉飲 朝廷大禮番之經典載之律誥固古今盛

事風示邦人但本縣一年二次額設酒席不過用銀拾兩共該銀二十兩已穀牲醴果核一應賓主執事之費況自古兗首瓠葉用獻君子蘋蘩蘊藻可羞王公而民貧時歛又多殺禮冊設鄉飲酒銀三十兩大抵多爲在官買辦人役尅落實非從厚伏乞減去銀十兩

一冊設文廟二祭共銀五十兩社稷山川壇各二祭共銀四十兩邑厲壇三祭共銀三十兩鄉賢名宦祠各二祭共銀一十六兩張孝子董孝子白龍潭永昌潭各一祭共銀一十六兩竊惟祭禮不在於侈費而

在於謹嚴其所用牲牢禮帛黍稷之屬但當如法不可缺少亦不宜暴殄以褻神明故陶匏掃地可以事天而黷于祭祀時謂弗欽况本縣前項祭祀品物本縣已行逐一照數估價其實不須前項銀兩大抵多爲鋪行人等通同在官人役尅落伏乞於文廟二祭共銀四十兩社稷山川壇各二祭共銀二十八兩邑厲壇三祭共銀一十五兩鄉賢名宦祠各二祭共銀八兩張董二祠白龍永昌二潭各一祭共銀八兩則所費之銀雖省於前而所祭之品一如其舊事神行禮散福分胙無有欠缺而神明亦慰安矣

一冊設本縣東西二郭接官亭門子共二名每名銀
二兩但上司及使客亦無甚往來就有往來亦不
止亭中其亭止是空屋一間又無器物看守况東郭
亭在清道觀前西郭亭連闌闌坊長總甲常川往來
何用門子伏乞革去

又

寧波府慈谿縣先准本縣知縣薛開前事內將本縣
雜辦合該減省數目開關到縣申巡按御史張批依
擬足見知縣留意節省實心愛民古之賢令弗能踰
也革去事宜告示該縣知悉其本官曾經承委查盤

處所若有當革通行酌處申奪蒙此准知縣薛闢前
事照得浙江一省爲府者十有一爲州者一爲縣者
七十有二爲衛者十有六爲所者三十有四倘蒙盡
照本縣裁減則一歲之省幾及五萬而積之十年遂
捐五十萬于民兩浙之疲瘵其將復蘇等因到縣准
此照得關內所開實係軍民願達之情申乞批示將
改議文冊除稅糧額辦外其本省之驛傳軍需均徭
里甲通行量加裁節立定數目重行翻刻給發州縣
庶可永爲遵守施行

一本府三衛九所二寨共城一十二座及定海昌國

二衛并大嵩等九所各有城垣前此小有所損當該
官司隨即申明措置修理用力少而成功易未嘗每
歲擾民至嘉靖四年蒙巡按御史潘批據本府經歷
司呈文每年每衛大城徵銀一百兩每所小城徵銀
三十兩每年該徵銀二千一百二十八兩三錢八分
七厘作爲十分均派民七軍三俱於該年見役里甲
出辦若通以十年總計則軍民共出銀二萬一千二
百八十三兩八厘七毫更加秤收火耗及經收人役
侵加所費實爲不貲及訪得前銀縣解於府其軍官
人等到府領回不審果然收貯在庫以候修城亦不

知作何下落本職思得前項城垣先此不會派銀之時亦未聞倒塌以召外侮若掌印各官常川巡視稍有尺寸之損隨即措置修補必不至於大壞豈有一時併修之患况十年之間城垣亦未必屢壞就壞亦豈至坐視盡行倒塌決不須前項許多銀兩修理推原其故不過當時吏胥通同衛所意圖侵尅造爲此說上司一時信之亦君子可欺以其方也本府小民興言及此疾首蹙額乞詳處博議着令各掌印官照前稍遇損壞隨時申呈估計修補以寬民力則城既不壞而民亦稱便矣

一本縣觀海龍山二處公館設於軍衛之中每爲官軍侵損雖設有門子各一名軍民勢殊不能看守約束甚至門窓磚瓦盡爲取去連年被該衛捏稱風雨損壞本縣恐海道上司一時按臨難以住劄只得前去修理縣官措置艱難或著令坐都糧長或分派里甲方完輒壞民甚苦之乞嚴行禁約將原設門子工食銀二兩給與該衛軍甲看守若仍前侵損就着令修理則軍人知警言而本縣小民一旦除累年之害矣一各處每年派審均徭里甲丁田俱照舊造黃冊及改正驛傳等項文冊似亦不能隱匿但豪富之家奸

猾之徒當造冊之年賄通總書人等將丁衆田多之家併在一年後來編審因此年丁田衆多各得輕省致使其別年分將丁田寡薄之家亦當一年額定差徭賦役不均小民受累莫此爲甚其間又有前後互掇那移規避者其弊多端不能枚舉乞著爲定規除以前五年役過編審者不開外今年以後就將槩縣冊籍丁田不拘見役迺年通融均算預先派定分作五年次第應辦待後造冊之年通將槩縣均徭丁田審派分作十年照前次第應辦則小民徭役得均而里書亦無以容其奸矣

一本縣額派各項料銀俱於丁田內出辦常年於二三月間審派責令里長催徵辦納小民當此青黃不接之時艱於措置不能即完部催司府司府催縣官吏更相督迫唯務自寬已責何暇更察民情致使里長常川在縣不能生理而捶撻驚呼有使人不忍聞者乞許令預先審派出給由帖就於徵收秋糧時候帶催則不惟小民當秋成之日易爲措辦而里長亦得以一併了事歸家生業縣官可以經理他事矣

一各縣每遇徵收均徭里甲丁田額辦雜辦料銀輒被奸貪之徒謀作收頭通同吏書恣意勒收秤頭火

耗等項加贈及至該解又被侵欺只得追併變產多至捏作細戶拖欠上累官府日夜督催下累小民重復陪擾此其爲害不可勝言乞自今以後縣置印信文簿督同佐貳官直堂吏典庫役照數收封開寫頭項逐一登記明白就令佐貳官嚴押經收庫役解府其該轉解各司者府令首領官嚴押解司即守取批廻銷繳庶免多收侵欺之弊而料價易完官民兩便矣

一府州縣新官到日其私衙一應家火舊派里甲出辦官取其私科其十甚爲擾民近蒙本院量官品

級議定數目每年於均徭內徵取三分之一貯庫收
候買辦不許另派里甲甚爲便益但近來官多不久
任兼有補任丁憂事故更代不常或半年一易者有
之或一年一易者有之久亦不過三年送故迎新爲
費頗廣其間賢者離任之日將家火交還公堂應用
又多爲在官人役侵匿乞申明曉諭今後新官到任
就將前項家火開關公堂置簿照數登記離任之日
逐一交盤接管人員收掌就與後官使用况銅鐵錫
器經久不朽椅桌床凳俱耐年月其有毀壞者聽其
明白開寫方許貯庫銀內補辦書謂細行不矜終累

大德此雖一節亦可以驗各官之操心制行矣况又有一等在官家人因官將去拆毀衙內門窓板壁以供爨燎致累修理此其爲費比之家火用財尤多亦須令驗視開載關文聲說明白方得啓行

一本縣舊時每遇新坊里長接役輒送各衙轎傘鋪蓋坐褥錫硯冕幃等項物件習爲故常恬不知畏今已嚴革但恐不特本縣爲然乞申明禁約

一本縣舊時各官出外多令坊長跟隨一應食費俱令出辦坊長又派小民思得各官自有俸米柴薪馬夫焉得輒轉擾害乞通行禁約

一本省各衛所每年造冊紙劄工食銀共計用銀六千三百七十七兩一錢五分四厘六毫五絲四忽其間雖有進表祿匣祭旗盤費亦不須前項銀兩本宜減去一倍恐武官不學其情有所不堪但伊亦當思朝廷念汝先世勲勞命汝子孫世享爵祿正宜感恩思報常存河山帶礪之心撫恤行伍愛養士卒以備不虞豈得侵漁以困其力坐致饑寒何以戰守乞將前項銀兩以十分爲率減去二分則每年各衛所軍士亦得以共免銀一千三百兩矣

一各處祠廟門子多有設二名者思得崇奉先哲其

敬之隆殺不在於門子之多寡今凡有二名處所擬合減去一名

一本省各處渡夫壩夫硨夫閘夫幾及千有餘名除衝要去處似不宜裁革其偏鄉僻地每年於均徭內審出多被光棍誑銀其有等去處實是不須夫役如本縣丈亭既有門子又有渡夫止是地方棍徒誑領工食並無一人應當况官負經過自帶有門子而民人往來彼此自相撐渡地方里老居民常川看管其實一無用處及西壩渡夫四名合亦革去二名車廐驛前自有水手館夫人役雖一名亦不必設矣

一各縣鄉宦士夫遷除及經過使客往還或不免有交際之禮其簡僻去處相接希少猶或可辦至於衝要繁劇之地縣官因支應不敢開載遂至多方搭派此甚非所以養其誠心事上不欺之道也乞明許令於本縣二分紙價內量取支給設立紙價文簿登記以憑吊查則其所接之當否所用之奢儉亦可以驗各官之人品矣

尚論先賢以嚴祀典

照得本縣欲將普濟寺改建書院祀宋儒楊慈湖先生因祀楊大隱杜石臺二先生及慈湖門人錢時傳

正夫併永樂間陳光世諸子俾後學觀法具申巡按
浙江監察御史張批細觀此事見奸偽不能惑知縣
矣足見知縣卓有定見超乎流俗遠矣哉依擬繳等
因到縣本縣隨將前寺佛像毀去正欲卜日擇工敬
造諸賢木主間隨蒙提督學校浙江按察司僉事徐
批據申足見崇正闢邪之意但欲金祀諸賢則尚有
可商確者蓋孔孟心學惟象山陸氏夫子得其正傳
而象山之門惟慈湖先生號稱高弟萬世而下學者
知立其大知尊德性皆其功也近時學術不明士風
瀾倒所宜獨表楊氏以示嚮往其餘諸賢考論功德

恐稍有間况已崇祀鄉賢祠復祀於此亦似反瀆

縣正官素耻詞章功利之習者也再一議報仍查照
察院批示施行此繳等因到縣竊惟近世學術不明
人心大壞本縣習俗更覺難言本職到任事上使下
之際不勝可慨自揣凡庸愧無以風示境內因見慈
湖楊氏子孫既已占住書院又每因上司按臨輒將
修理爲由告給工價公領私用虛費民財大壞良心
名雖優待先賢之後實則有負慈湖之靈本職頗欲
與人爲善見此實爲赧顏故欲將杜黃諸公併祀以
絕楊氏子孫後來希冀之念且當人欲橫流之中士

習頹敗之日示學者易爲思齊俾弗果於自棄心學
淵源姑置未講蓋寬以望世俗之中人也近蒙本道
批示直欲闢正路之榛蕪明心學之要領不惟詞章
功利者不得雜於其間雖從事於儒而流於支離汗
漫者亦當別議矣蓋嚴以待古今之賢人也本職平
心熟慮既欲崇尚正學以示士人嚮往誠不當姑徇
俗論以滋後來意見公是公非人心自定揚此抑彼
學術斯明合從本道獨表楊氏及再考其門人高第
如廬陵曾汲古建昌傅正夫嚴陵錢時廬陵曾熠吳
縣葉元吉吉水縣丞趙彥懺其言論記述載於楊氏

遺書者皆妙悟本心統宗易簡不泯沒於俗學支離之說而有得於象山之的傳與聞孔孟之正脉者也雖非生於斯土而實精神會晤於一堂擬合旁列左右以見其授受之相孚道心之協一旦因表楊氏門墻之盛而後學拜瞻知所從事其餘楊大隱杜石臺陳光世諸賢仍遵依止祀於鄉賢祠弗得再瀆庶功德允當義法森嚴而人心學術漸知嚮往矣其書院原係廢寺改建今查舊有寺田就爲春秋享祀并修理廢用除召佃戶承認設法另行具數繳報外緣係遵奉再一議報事理合關本縣轉達施行

申禁軍衛擅自徵運民產錢糧

觀海衛軍置本縣民產該糧一百七十三石七斗四合伍勺七抄五撮不行完納及節次行文催趨該衛帖稱三月初七日差收頭程安定葉克和解運原坐倉分上納因無監收官負糧米堆架在彼及查原坐廣積一倉運納人戶俱有串單銷繳惟軍甲錢糧獨無監收中間顯是搪調及參照得凡軍置民產必須送縣完納領運庶額數可查事體歸一今該衛不思版籍錢糧爲重倚恃武職縱軍侵匿就使果係自行解運亦紊亂成規前此未有將來必仗軍民不相統

屬侵匿欺隱情弊從此造端本縣官民貽累匪輕防
微杜漸不可不慮乞究察禁革庶制額錢糧徵解歸
一擬合通行申究

裁革甲首夫役

照得本縣原係二百里內除人戶貧乏并逃絕里分
計轄全里共一百五十二里三分先該縣官不遵議
處文冊每年見役里甲各出夫一名每名約工食銀
陸兩多被傍縣棍徒影射一人包當數名里長又因
而科取甲首耗財頗多害民匪小本職深欲盡行革
去但恐上司一時按臨不彀迎送差遣擬議之間不

能盡如初意自今以後計兩全里朋出夫一名止該夫七十六名如上司按臨更有不敷其時自當另出告示量起人夫暫令應用一待起馬隨即散去爲此出給告示革去全夫止許兩全里朋出一名聽差如有包當之徒串同里長勒索甲首全夫工食者許被害之人指實陳告以憑究問不恕

稽查紙價贓罰

照得本職到任止憑權署縣印本府馬推官將耳房庫銀兩對面交盤寫立合同文簿各收執照當令庫役孫濂收領看守訖及照交盤簿內開欸并吊庫

孫濂日黃堯簿開載紙價贓罰除係上司發追外其
係本縣追收未經申報者止有銀二兩七錢四分二
厘豈前官盡是聖賢使民無訟亦豈盡爲不才恣行
竊去揆厥所原多由吏書人等通同庫役作弊毀滅
卷宗移 冊籍合計侵分漫無忌憚官更更改遂難
稽查致使糴穀備賑之明條視爲虛文而鈞金束矢
之古意反滋末弊本職初見民窮犯該笞杖者量情
發落勉諭改過悉免紙張後因民俗好訟其有罪者
亦照例量追貯庫以寓裁抑之意但恐才疎事繁人
情多詐况本職見以具疏乞改教職一旦更去則承

行接管之際不免亦有前弊矣爲此開關本縣官吏
公同將本職自到任以後紙價贓罰逐一清查某項貯
庫上倉某項見監追併總撤數目備細攢造文冊自
今爲始逐季申報上司庶上下相制卷冊可查前項
人役亦知警畏矣

申請委官署印

緣職氣體羸弱素患痰火勉強辦事益發哮喘據醫
生方邦畿等診視稱言若不乘早謝事調治大患在
即職亦自知病根已久力難支持今年二月中關煩
本縣申府不允三月中隨具本陳情令義男薛旺赴

京乞恩奏改教職起程間蒙巡按御史張按臨本縣
仍具狀面告亦不蒙准允隨將家累發回夙夜效勞
不敢推避柰本縣有等豪強刁黠出沒衙門與上官
之胥吏締交合黨甚至如陸象山所謂能役士大夫
護之如手足捍頭目者亦往往有之根盤至此寔難
整理本職旣以居官受祿不敢避事推奸畧遵治繩
之規冀效解紘之績除小民無知犯法者隨即量情
發落不敢畱滯以妨生業其大奸大惡罪犯多端前
官畏憚莫敢誰何者輒不避患害畧正科條問口外
爲民者一問充軍者十有二問徒罪者十有二自彼

言之毀茂典章縱恣貪惡乃其故常一旦有此忿忿不堪自職論之因係牧民衙門寔多寬假雖摘其尤者問之然亦每從末減豈意本府不察此情計串一千惡黨日夜撓拾柰職素嚴自守衙宇四壁水火無干無由尋釁然亦岌岌乎殆矣審已量力不敢不言而見幾識微亦宜蚤去况見因勞積病增終夜咳嗽時吐血痰倏忽迷暈久近之期所不忍言情不能堪勢亦難處除已差人引例陳情奏改外爲此關煩轉達委廉能府貳官署掌本縣印信等因申蒙巡按御史金批慈谿之政本院素聞其中有未協者自當孚

信何足爲異本官宜安心辦事無興異念報政三年
任行高志申請再三恐人將視以爲矯若必欲改官
則本院亦必有他處恐本官亦不得坐索高價也知
之

繳正學書院批申

爲尚論先賢以嚴祀典事申蒙提學僉事徐批正學
不明士失所宗久矣該縣此舉甚善甚善俱依擬行
此繳蒙此案照先爲出巡事蒙本道批據本縣申文
蒙批據申具見闢邪崇正之意但欲並祀諸賢則尚
有可商確者蓋孔子孟心學惟象山陸氏夫子得其正

傳而象山之門惟慈湖先生號稱高弟萬世而下知
立其大知尊德性皆其功也近時學術不明士風瀾
倒所宜獨表楊氏以示嚮往其餘諸賢考論功德恐
稍有間况已崇祀鄉賢祠復祀於此亦似反瀆該縣
正官素耻詞章功利之習者也再一議報仍查照察
院批示施行依蒙重行議申去後蒙批前因除遵依
外謹卜本月初二日奉慈湖楊先生及其門人廬陵
曾汲古建昌傅正夫嚴陵錢時廬陵曾熠吳縣葉元
吉吉水縣丞趙彥懺木主神位率官屬師生送入書
院莫妥如禮其書院規模亦甚寬廣額匾就遵本道

批內正學二字題爲正學書院庶幾永作學者公共
藏脩去處因以激勸後人如有賢者學宗正傳皆可
得入不爲一家私占以蹈前弊及查舊有寺田就作
每年春秋祭祀脩理支費已經併申其書院基地丈
尺房屋間架樹木株數併田畝數目坐落住址字號
佃戶姓名租稅原額逐一查明造冊見在但本縣衙
門人役滋僞巧弊雖徵解錢糧多爲侵盜前項書院
屋地田租等項若令掌管時更歲改必盡行埋沒立
見荒廢合無本縣每遇徵收田租之時或掌印官或
委管糧官就在本縣儒學另立一倉公同教官驗收

積貯就令教官掌管支費數目每歲終開報本縣轉
申提學道照驗以憑稽查庶書院不至荒蕪而田租
不至侵匿矣